

四庫全書

經部

欽定四庫全書

經部

尚書考異卷三至五

詳校官給事中臣王鍾健

通政使司副使臣莫瞻菴覆勘

總校官降調編修臣倉聖脉

校對官中書臣宋枋遠

謄錄監生臣凌和鈞

欽定四庫全書

尚書考異卷三

明 梅鷟 撰

仲虺之誥

恐來世以台為口實

襄二十二年公孫僑對晉人曰若不恤其患而以為口實
實楚語王孫圉曰使無以寡君為口實

殖有禮覆昏暴

閔元年齊仲孫湫曰魯不弃周禮未可動也君其務寧
魯難而親之親有禮因重固間攜貳覆昏亂霸王之器
也又晉語公孫固曰晉文子殆有禮矣樹於有禮必有
父語曰湯降不遲聖敬日躋有禮之謂也

史記湯修德諸侯皆歸湯遂率兵以伐夏桀桀走鳴條
遂放而死

惟有慙德

襄二十九年季札見舞韶濩者曰聖人之弘也而猶有

慙德聖人之難也

慎厥終惟其始

表記子曰事君慎始而敬終

肇我邦于有夏若苗之有莠若粟之有秕小大戰
戰罔不懼于非辜矧予之德言足聽聞

史記桀乃召湯而囚之夏臺已而釋之亢倉子農道篇
凡苗之患先生者美米後生者為秕不知耨者去其兄
而養其弟不收其粟而收其秕

若苗之有莠若粟之有秕

襄三十年過伯有氏其門上生莠子羽曰其莠猶在乎此其句法意義雖不相類但目擊莠字而發其獨智則不可誣也或曰子之据撫無乃已甚乎曰非然也慙德取于前苗莠取于後仲虺之志在于中其當時蒐竊之情固如此也又定公夾谷之會孔子曰用秕稗也

予聞曰能自得師者王謂人莫已若者亡好問則裕自用則小

荀子堯問篇楚莊王曰不穀謀事而當羣臣莫能逮是以憂也其在中歸之言也曰諸侯自為得師者王得友者霸得疑者存自為謀而莫已若者亡今以不穀之不肖而羣臣莫吾逮者國幾于亡乎是以憂也今改諸侯字為能字改自為謀而四字為謂人二字又摘去得友者霸得疑者存二句其取舍之意亦有識矣而於下文即橫奪周公之言之者意以與仲虺蓋不可也周公謂伯禽之傳曰蓋志而子美德乎對曰其為人寬好自用

以慎三者其美德也已周公曰嗚呼以人惡為美德乎
君子如以道德故其民歸道彼其寬也出無辨矣汝又
美之彼其好自用也是所以婁小也君子力如牛不與
牛爭力走如馬不與馬爭走知如士不與士爭知彼爭
者均者之器也汝又美之彼其慎也是其所以淺也聞
之曰無越踰不見士見士周曰無乃不察乎不問則物
少至少至則淺彼淺者賤人之道也汝又美之又好問
字見中庸裕字見今文書即淺字之反也楊倞註中歸

即仲虺蓋見古文摘取其語而云然也細玩之恐非一人

定元年薛宰曰薛之皇祖奚仲居薛以為夏車正奚仲遷于邳仲虺居薛以為湯左相

兼弱攻昧取亂侮亡推亡固存邦乃其昌

襄公三十年仲虺之志云亂者取之亡者侮之推亡固存國之利也引志為語改國之利為邦乃昌宣十二年隨武子曰兼弱攻昧武之善經也仲虺有言曰取亂侮

亡兼弱也。乃曰於鑠王師，遵養時晦者，昧也。武曰：無競惟烈，撫弱者，昧以務烈所可也。襄十四年中，行獻子曰：仲虺有言曰：亡者侮之亂者取之，推亡固存之道也。正義曰：此傳取彼之意而改之，辭匪本文也。

實繁有徒

左傳昭二十八年，叔游曰：鄭書有之，惡直醜正，實蕃有徒。杜註：鄭書古書名，張霸之偽也。多遺古文之菴也已。嚴又襄三十年，子產曰：鄭書有之，安定國家必大焉。先

湯誥

其爾萬方有罪在予一人予一人有罪無以爾萬
方

周語內史過曰其在湯誓余一人有罪無以萬夫萬夫
有罪在余一人常昭註湯誓商書伐桀之誓也今湯誓
無此言則已散亡矣 今按論語朕躬有罪無以萬方
萬方有罪罪在朕躬

凡我造邦無從匪彛無即愾淫各守爾典以承天

休

周語單子曰先王之令有之曰天道賞善而罰淫故凡我造國無云云天休

夏王滅德作威以數虐于爾萬方百姓爾萬方百姓惟其凶害弗忍荼毒並告無辜于上下神祇

晉語韓宣子曰上下神祇無不徧諭也哀公十七年渾良夫叫天無辜

史記夏桀不務德而殘傷百姓百姓不堪

史記自契至湯八遷湯始居亳從先王居作帝誥一作
帝咎又葛伯不祀湯始伐之

王曰嗟爾萬方有衆明聽予一人誥惟皇上帝降
衷于下民若有恒性克綏厥猷惟后

晉語梁由靡曰以君之靈鬼神降衷

吳語夫差曰今天降衷於吳內傳劉子曰民受天地之
中以生左傳天誘其衷中庸曰天命之謂性

敢昭告于上天神后請罪有夏聿求元聖與之戮

力以與爾有衆請命

淮南子汜論訓上高皇帝云以與百姓請命于皇天漢書賈捐之曰賴漢初興為百姓請命

湯曰予有言人視水見形視民知治否伊尹曰明哉言能聽道乃進君國子民為善皆在王官勉哉勉哉湯曰汝不能敬命予大罰殛之無有攸赦又伊尹云云汝鳩汝房既繼夏命作湯誥

隕于深淵 萬方有衆 降災于夏邑

左傳芊尹蓋對吳人之言

盤庚曰有衆咸造又曰綏

爰有衆微子天毒降災荒殷邦

多士弗弔昊天大降喪于殷我有周佑命將天明威致
王罰

聿求元聖與之戮力

孟子曰伊尹聖之任者也漢高祖曰臣與將軍戮力而
攻秦嗟爾萬方有衆明聽予一人誥有衆二字見盤
庚湯誓稱朕今因既克夏以天子之稱自稱

夏王滅德作威以敷虐于爾萬方百姓爾萬方百姓罹其凶害弗忍荼毒並告無辜于上下神祇天道福善禍淫降災于夏以彰厥罪

此一段修節呂刑文彼皆論苗移以加之桀弗用靈滅德也制以刑惟作五虐之刑曰法作威也殺戮無辜爰始淫為剝削桀黠所謂敷虐于爾萬方百姓也虐威庶戮方告無辜于上者所謂爾萬方百姓罹其凶害弗忍荼毒並告無辜于上下神祇也又於下文有曰上帝不

蠲降咎于苗者所謂天道福善禍淫降災于夏以彰厥
罪也但恐桀之鬼笑於地下曰以數苗者數已何居苗
之鬼報于地下曰已罪終不可湔收桀連坐奚忍君子
斷之曰桀之惡固不減于苗但盜獄辭囹圄于信故桀
不能如苗之無辭于罰牧誓俾暴虐于百姓金縢曰今
天動威以彰周公之德今則反用之曰降災于夏以彰
厥罪所謂是可忍也多方曰誕作民主又曰告爾有方
多士

王歸自克夏至于亳誕告萬方

周書多方小序成王歸自奄在宗周誥庶邦作多方又多方本篇王来自奄至于宗周

嗟爾萬方有衆明聽予一人誥

顧命王若曰庶邦侯甸男衛惟予一人釗報誥

吾讀晉人偽湯誥而知蔡傳之叛夫子蔑論語悖先師也堯曰第二十載成湯請命伐桀之詞曰予小子履敢用玄牡敢昭告于皇皇后帝有罪不敢赦帝臣不蔽簡在

帝心朕躬有罪無以萬方萬方有罪罪在朕躬如是而已
晉人改之曰肆台小子將天命明威不敢赦去論語
之履字者以湯自名天乙以明示論語之訛也取有罪
不敢赦之意而進之敢用玄牡之前其意將以急承上
文出於不得已猶之可也皇皇后帝改作上天神后因
上文已有惟皇上帝欲變文耳似亦出於不得已猶之
可也若乃離過其文增以請罪有夏至以承天休一段
何橫哉帝臣不蔽對上帝之辭也爾有善朕弗敢蔽對

衆之辭也有罪不敢救移置於遠則肆為罪當朕躬弗敢自救之言論語無此自救之文也惟簡在上帝之心一句增三字其爾萬方有罪在予一人予一人有罪無以爾萬方則又顛倒其文矣凡皆不信夫子蔑棄論語之意也蔡沈曾不註其異同考據得失其意亦將挾古文以令論語也此非叛夫子蔑論語而何又蔡傳已有罪不敢以自恕鄒季友曰朱子大學或問恕字可施於人不可施於己以自恕訓自救似亦未的此非悖先師

而何又金縢一篇朱子作傳文義精密蔡沈一切反之載在文集可考也當改者亦當三年無改今師說是而必欲改以逞已說沈亦忍矣哉

天道福善禍淫凡我造邦無從匪彞無即愾淫各守爾典以承天休

周語單子曰先王之令有之曰天道賞善而罰淫故凡我造國無從匪彞無即愾淫各守爾典以承天休今亦離間其文又改賞善為福善罰淫為禍淫以易文可據

而改之也置之於前然後增以降災于夏至若將隕于
深淵一段乃復接凡我造邦云云邦字周語作國以論
語之文間於國語之文復以國語之文間於論語之文
何若斷絕本書之文以成其愚志既改避其言又改避
其意使人不可躡其蹤殊不知自智者燭之付之一哂
耳且單子稱先王之令有之而不言書云則取之入於
湯之誥吾亦所不敢信也又曰從單子引先王之令言
則匪彛惱淫所謂淫也各守爾典則不從匪彛即惱淫

所謂善也故以承上天賞善之休若從晉人離間其文之義則以有夏為淫義俱不貫矣智者宜審之

惟元祀十有二月乙丑

漢書律歷志言商十二月乙丑朔旦冬至

伊訓

于其子孫弗率皇天降災假手于我有命造攻自鳴條朕哉自亳

晉語驪姬曰無必假手于武王左傳隱十一年鄭莊公

曰天禍許國鬼神實不逞于許君而假手于我寡人
史記伊尹作伊訓作肆命作徂后

敢有侮聖言逆忠直遠耆德比頑童時謂亂風

論語侮聖人之言鄭語史伯曰惡角犀豐盈而近頑童
窮固焉比謀吳語子胥曰今王播棄黎老而孩提焉比
謀先漢樊噲言郡國舉孝廉率取年少能報恩者耆宿
大臣多見廢棄

先王肇修人紀從諫弗咈先民時若居上克明為

下克忠與人不求備檢身若不及以至于有萬邦
茲惟艱哉

荀子君臣篇曰書曰從命而不拂微諫而不倦為上則
明為下則遜下文又曰敬而不順者不忠者也淮南子
汜論訓下君子不責備於一人亢倉子訓道篇君子檢
身常若過班彪王命論見善如不及用人惟由已從諫
如順流詩曰惟先民是程

古有夏先后方懋厥德罔有天災山川鬼神亦莫

不寧暨鳥獸魚鼈咸若

宣三年王孫滿曰昔夏之方有德也使民知神姦故民入川澤山林不逢不若用能協于上下以承天休桀有昏德鼎遷于商小雅曰方茂爾惡

惟上帝不常作善降之百祥作不善降之百殃

康誥曰惟命不于常詩曰天命靡常易曰積善之家必
有餘慶積不善之家必
有餘殃漢書吳王傳天子制詔將軍蓋聞為善者天報以福為非者天報以殃

爾惟德罔小萬邦惟慶爾惟不德罔大隆厥宗

易繫辭曰善不積不足以成名惡不積不足以滅身又大學傳此謂一言僨事一人定國朱子謂即此二句之意

太甲上

營于桐宮密邇先王其訓無俾世迷王徂桐宮居憂克終允德

公孫丑曰放太甲于桐吳語董褐曰孤以下密邇於天

子居於桐處仁遷義又成十六年子叔聲伯曰以魯之
密邇仇讎

史記帝太甲既立三年不明暴虐不遵湯法亂德于是
伊尹放之於桐宮三年伊尹攝行政當國以朝諸侯帝
太甲居桐宮三年悔過自責反善於是伊尹乃迎太甲
而授之政帝太甲修德諸侯咸歸殷百姓以寧伊尹嘉
之乃作太甲訓三篇褒帝太甲稱太宗

晉語寺人勃鞞曰伊尹放太甲而卒以為明王又曰左

相以終克成令名

祇爾厥辟辟不辟忝厥祖王惟庸罔念聞

坊記子云父子不同位以厚敬也書云厥辟不辟忝厥

祖

惟尹躬先見于西邑夏自周有終相亦惟終其後

嗣王罔克有終相亦罔終

緇衣尹吉曰惟云云亦惟終

無越厥命以自覆慎乃儉德惟懷永圖若虞機張

徃省括于度則釋

緇衣太甲曰無越云云自覆也若虞機張徃省括于度則釋

先王昧爽不顯坐以待旦

昭三年叔向引讒鼎之銘曰昧旦丕顯後世猶怠孟子曰周公坐以待旦

茲惟不義習與性成子弗狎于不順

孔子曰少成若天性習慣如自然賈子曰習與智長故

切而不媿化與心成故中道若性公孫丑曰伊尹曰予
不狎于不順

太甲中

伊尹以冕服奉嗣王歸于亳作書曰民非后罔克
胥匡以生后非民罔以辟四方

周語內史興曰太宰以王命命冕服內史贊三命而后
即冕服又前篇內史過曰夫晉侯非嗣也表記民非后
四句罔作無克作能無匡生作寧

欲敗度縱敗禮

昭十年子皮曰書曰云云我之謂矣夫子知度與禮我實縱欲而不能自克也

天作孽猶可違自作孽不可追

緇衣太甲云云去猶字增也字末句作不可以追

尚賴匡救之德圖惟厥終

僖二十六年展喜曰彌縫其闕而匡救其災問命又曰實賴左右前後有位之士匡其不及

伊尹拜手稽首曰修厥身允德協于下惟明后先
王子惠困窮民服厥命固有不悅

淮南子修務訓湯夙興夜寐以致聰明輕賦薄斂以寬
民氓布德施惠以振困窮弔死問疾以養孤孀百姓親
附政令流行上篇昧爽不顯坐以待旦即夙興夜寐之
句也

視遠惟明聽德惟聰

周語單穆子曰故必聽和而視正聽和則聰視正則明

聰則言聽明則德昭又論語可謂明也已矣可謂遠也已矣

太甲下

惟天無親克敬惟親民罔常懷懷于有仁鬼神無常享享于克誠天位艱哉

僖五年宮之奇曰鬼神匪人實親惟德是依故周書曰
皇天無親惟德是輔杜註逸書又曰泰稷匪馨明德惟
馨又曰民不易物惟德繫物

旅焚凡四處用此節

先王惟時懋敬厥德克配上帝

詩曰聿修厥德又曰克配上帝

若升高必自下

中庸曰辟如行遠必自邇辟如登高必自卑

無輕民事惟難無安厥位惟危慎終于始

孟子曰民事不可緩荀子議兵及禮論皆言慎終如始
終始如一襄十年魏絳曰抑臣願君安其樂而思其終
也

周書蔡仲之命曰皇天無親惟德是輔民心無常惟惠

之懷為善不同同歸于治為惡不同同歸于亂爾其戒
哉慎厥初惟厥終終以不困不惟厥終終以困窮首四
句即太甲下篇首四句為善不同四句即德惟治六句
小出入其下文初終之戒即終始慎厥與之意此可見
其出於一手一律之意又下文無作聰明亂舊章與罔
以辨言亂舊政罔以側言改厥度字樣句法雖閃避多
方而情狀終不可掩也襄二十五年太叔文子曰君子
之行思其終也思其復也書曰慎始而敬終終以不困

杜註逸書正義曰蔡仲之命云慎厥初惟厥終終以不
困此所引者蓋是彼文學者各傳所聞而字有改易或
引其意而不全其文故不同也蓋慎厥初即慎始惟厥
終即上文思其終故為繆亂何不同之有

咸有一德

惟尹躬暨湯咸有一德

緇衣尹吉曰惟尹云云

史記伊尹作咸有一德咎單作明居皆在湯崩之先司

馬貞曰尚書伊尹作咸有一德在太甲時太史公記之於斯謂成湯之日其言又失次序

今嗣王新服厥命惟新厥德終始惟一時乃日新詩其命惟新荀子議兵篇慎終如始終始如一夫是之謂大吉湯之盤銘曰苟日新禮論又曰君子敬始而慎終終始如一召誥曰越厥後王後民祗服厥命召誥又曰今王嗣受厥命又曰王乃初服

伊尹既復政厥辟將告歸乃陳戒于德曰嗚呼天

難諶命靡常常厥德保厥位厥德靡常九有以亡
既字用金縢既克商之既復政厥辟用洛誥復子明辟
之句君奭曰天命不易天難諶詩大雅曰天難諶斯又
曰天命靡常

德惟一動罔不吉德二三動罔不凶

成八年季文子曰霸主將德是以而二三之其何以長
有諸侯乎

皇天弗保監于萬方

大雅皇矣上帝監觀四方

眷求一德俾作神主

詩卷阿百神爾主矣

匹夫匹婦不獲自盡民主罔與成厥功

孟子匹夫匹婦有不與被堯舜之澤者若已推而納之
溝中

夏王弗克庸德

中庸庸德之行又以承上文常德又多士是弗克庸帝

改帝為德大淫佚有辭以慢神虐民易之惟時天罔念
聞厥惟廢元命降致罰約以皇天弗保四字乃命爾先
祖成湯革夏則又敷衍為啓迪有命至爰革夏正又曰
罔顧于天顯民祇惟時上帝不保故易慢神云云

非天私我有商惟天佑于一德非商求于下民惟
民歸于一德

楚辭皇天無私阿兮覽民德焉錯輔多士我有周佑命
又曰我其敢求位

七世之廟可以觀德萬夫之長可以觀政

呂氏春秋第十三卷引商書曰五世之廟可以觀怪萬夫之長可以生謀高誘曰逸書今以德字易怪字以觀政易生謀字以七世易五世字按禮祖有功宗有德漢書韋賢傳王舜劉歆議曰禮記王制及春秋穀梁傳天子七廟諸侯五大夫三士二其文曰天子三昭三穆與太祖之廟而七諸侯二昭二穆與太祖之廟而五故德厚者流光德薄者流卑七者其正法數可常數者也宗

不在數中宗變也苟有功德則宗之不可預為設數故於殷太甲為太宗大戊曰中宗武丁曰高宗周公為無逸之戒舉殷三宗以勸成王由是言之宗無數也然則所以勸帝者之功德博矣今因其后有論殷三宗之說遂勦入此四句又孟子子貢曰見其禮而知其政聞其樂而知其德

說命上

王宅憂亮陰三祀既免喪其惟弗言羣臣咸諫于

王曰嗚呼知之曰明哲明哲實作則天子惟君萬
邦百官承式王言惟作命不言臣下罔攸稟令王
庸作書以誥曰以台正于四方台恐德弗類茲故
弗言恭默思道夢帝賚予良弼其代予言乃審
厥象俾以形旁求于天下說纂傳嚴之野惟肖爰
立作相王置諸其左右

楚語白公子張曰昔殷武丁能聳其德至于神明以入
于河自河徂亳於是乎三年默以思道卿士患之曰王

言以出令也若不言是無所稟令也武丁於是作書曰
呂氏春秋十八卷高宗天子也即位諒闇三年不言卿
大夫恐懼患之高宗乃言曰以余一人正四方余唯恐
言之不類也茲故不言如是而又以象夢求四方之賢
聖得傅說以來升以為公而使朝夕規諫曰若金用女
作礪若津水用女作舟若大旱用女作霖雨啓乃心沃
朕心若藥不瞑眩厥疾不瘳若跣弗視地厥足用傷若
武丁之神明也其聖之叡廣也其知之不疚也猶自謂

未久故三年默以思道既得道猶不敢專制使以象旁
求聖人既得以為輔又恐其荒失遺亡故使朝夕規誨
箴諫曰必交修予無余棄也今君或者未及武丁而惡
規諫者不亦難乎喪服四制書云高宗諒闇三年不言
此之謂也然而曰言不文者謂臣下也史記帝武丁即
位思復興殷而未得其佐三年不言政事決定於冢宰以
觀國風武丁夜夢得聖人名曰說以夢所見視羣臣百
吏皆非也於是乃使百工營求之得說于傅險中是時

說為胥靡築于傅險見於武丁武丁曰是也得而與之
語果聖人舉以為相殷國大治故遂以傅險姓之號曰
傅說

坊記高宗云云三年其惟不言言乃謹

說命中

惟口起羞惟甲冑起戎惟衣裳在笥惟干戈省厥
躬王惟戒茲允茲克明乃罔不休

緇衣允命曰惟口云云厥躬正同但戎字作兵

惟治亂在庶官官不及私昵惟其能爵罔及惡德
惟其賢慮善以動動惟厥時有其善喪厥善矜其
能喪厥功惟事事乃其有備有備無患無啓寵納
侮無耻過作非惟厥攸居政事惟醇黷于祭祀時
謂弗欽禮煩則亂事神則難

緇衣兌命曰爵無及惡德民立而正事純而祭祀是為
不敬事煩則亂事神則難荀子性惡篇古者刑不過罪
爵不踰德刑罰不怒罪爵賞不踰德亂世不然刑罰怒

罪爵賞踰德以族論罪以世舉賢下文又曰以義制事則知所利矣顏淵曰願無伐善無施勞老子曰自伐者無功自矜者不長子夏曰小人之過也必文子曰過而不改是謂過矣孟子曰今之君子過則順之豈徒順之又從而為之辭

無啓寵納侮

定元年士伯曰啓寵納侮其此之謂矣正義曰傳說進戒於王云無啓寵納侮古有此言故曰其此之謂矣

樹后王君公不惟逸豫惟以亂民

左文十三年邾文公曰天生民而樹之君以利之也

說乃言惟服

詩曰我言惟服

說命下

惟學遜志務時敏厥修乃來允懷于茲道積于厥躬惟敷學半念終始典于學厥德修罔覺監于先王成憲其永無愆惟說式克欽承旁招俊乂列于

庶位

文王世子引兌命曰念終始典于學學記曰古之王者建國君民教學為先說命曰念終始典于學其斯之謂乎學記又曰故教學相長也說命曰敷學半其斯之謂乎又引說命曰敬孫務時敏厥修乃來

改教為敷者用
鹽庚敷于民

一夫不獲時予之辜

後漢書質帝本紀詔曰昔之為政一物不得其所若已為之

昔先正保衡作我先王乃曰予弗克俾厥后惟堯
舜其心愧耻若撻于市一夫不獲則曰時予之辜
佑我烈祖格于皇天爾尚明保予罔俾阿衡專美
有商

雲漢之詩曰羣公先正孟子曰伊尹曰我豈若使是君
為堯舜之君哉上句曰予弗克云云下又遽曰其心於
文理口氣皆不妥帖北宮黝思以一毫挫於人若撻於
市匹夫匹婦有不與被堯舜之澤者今約為一夫不獲

四字若已推而納之溝中今約為時予之辜四字無逸
曰作其即位君奭曰在昔成湯既受命時則有若伊尹
格于皇天在太甲時則有若保衡詩曰嗟嗟烈祖又緇
衣引逸詩曰昔吾有先正其言明且清

罔俾阿衡專美有商

後漢書傅毅作迪志詩曰於赫我祖顯于殷國二迹阿
衡克光其則注曰阿衡伊尹也古文尚書曰爾尚明保
予罔俾阿衡專美有商故曰二迹也言傳說功比伊尹

而能光大其法則也詩又曰爰作股肱書則曰股肱惟人詩又曰俊乂式序書則曰旁招俊乂因詩用周頌式序在位之文書則曰列于庶位詩又曰啓我童蒙書則曰啓乃心詩又曰清我灌溉書則曰沃朕心蔡沈曰沃灌溉也

明哲實作則

昭六年叔向曰書曰聖作則杜註逸書

非知之艱行之惟艱

昭十年子皮曰非知之實難將在行之

尚書考異卷三

欽定四庫全書

尚書考異卷四

明 梅鷟 撰

泰誓上

今商王受弗敬上天降災下民沉湎冒色敢行暴虐罪人以族官人以世惟宮室臺榭陂池侈服以殘害于爾萬姓焚炙忠良剝剔孕婦

史記帝紂資辨捷疾聞見甚敏材力過人手格猛獸知

足以拒諫言足以飾非矜人臣以能高天下以聲以為
皆出已之下好酒淫樂嬖于婦人愛妲己惟妲己之言
是聽於是使師涓作新淫聲北里之舞靡靡之樂賦稅
以實鹿臺之錢而盈鉅橋之粟貨物充仞宮室益廣沙
丘苑臺云慢於鬼神大晏樂戲於沙丘酒池肉林使男
女僕相逐其中為長夜之飲百姓怨望諸侯有畔乃重
刑辟有炮烙之法醢九侯鄂侯囚西伯姜里用費中惡
來廢商容剖比干囚箕子周本紀又武王間紂昏亂暴

虐滋甚殺王子比干囚箕子太師疵少師強抱其樂器而奔周武王徧告諸侯曰殷有重罪不可以不畢伐十一年十二月戊午師畢渡盟津諸侯咸會曰孳孳無怠武王乃作泰誓告于衆庶令殷王紂乃用其婦人之言自絕于天毀壞其三正離遏其王父母弟乃斷棄其先祖之樂乃為淫聲用變亂正聲怡說婦人故今予發維共行天罰勉哉夫子不可再不可三荀子性惡篇以族論罪以世舉賢故一人有罪三族皆夷德雖如舜不免刑

均是以族論罪也先祖當賢子孫必顯行雖如桀紂列從必尊此以世舉賢也以族論罪以世舉賢雖欲無亂得乎哉此因行雖如桀紂之句故蒐入誓辭但荀之意本借紂以明此語匪謂紂即官人以世者也飛廉善走惡來善馭其知政而任之也初何世之有上文刑罰不怒罪爵賞不踰德為說命縮取下文以義制事為仲虺之誥畧取淮南子本經訓帝有桀紂為璇室瑤臺象廊玉牀紂為肉脯酒池燎焚天下之財罷苦萬民之命剗

諫者剔孕婦攘天下虐百姓又主術訓衰世則不然竭
百姓之力以奉耳目之欲志專在於宮室臺榭陂池苑
囿又曰紂殺王子比干而天下怨斷朝涉者之脛而萬
民叛再舉而天下失矣又前倣真訓逮至夏桀殷紂燔
生人辜諫者為炮烙鑄金柱剖賢人之心折才士之脛
醢鬼侯之女趙梅伯之骸

尚書註疏尚書遭秦而亡漢初不知篇數武帝時有太
常蓼侯孔臧者安國之從兄也與安國書云時人惟聞

尚書二十八篇取象二十八宿謂為信然不知其有百篇也

云

不得同以泰誓為篇名也

惟天地萬物父母惟人萬物之靈

後漢書劉陶傳上疏曰臣聞人非天地無以為生天地非人無以為靈是故帝非人不立人非帝不寧夫天之與帝帝之與人猶頭之與足相須而行也因下文有目不視鳴條之師耳不聞檀車之聲故竊此

商罪貫盈天命誅之予弗順天厥罪惟鈞

湯誓曰有夏多罪天命誅之又曰予畏上帝不敢不正
宣六年中行桓子曰使疾其民以盈其貫將可殪也因
下文引周書曰殪戎殷故言商罪貫盈猶面牆之類

予小子夙夜祗懼受命文考類于上帝宜于冢土
以爾有衆底天之罰

王制天子將出征類乎上帝宜乎社造乎禰詩太王乃
立冢土王制又曰受命於祖

泰誓中

朋家作仇

僖九年卻芮曰亡人無黨有黨必有讎此因微子篇方興相為敵仇之言

王次于河朔

莊三年凡師一宿為舍再宿為信過信為次

今商王受力行無度播棄犁老昵比罪人淫酗肆

虐臣下化之朋家作仇脅權相滅無辜顓天穢德

彰聞

吳語申胥曰今王播棄犁老而孩提焉比謀

桓七年楚鬬廉曰師克在和不在衆商周之不敵君之所聞也成軍以出又何濟焉杜註商紂也周武王也傳曰武王有亂臣十人紂有億兆夷人

吉人為善惟日不足凶人為不善亦惟日不足

易曰吉人之辭寡文十八年史克曰四門穆穆無凶人也今行父雖未獲一吉人去一凶矣小雅曰降爾遐福維日不足

同德度義

成二年君子曰泰誓所謂殷兆民離周十人同者衆也
昭二十四年左傳召簡公南宮嚳以甘桓公見王子朝
劉子謂萇弘曰甘氏又往矣對曰何害同德度義泰誓
曰紂有億兆夷人亦有離德予有亂臣十人同心同德
杜氏註曰言唯同心同德則能謀義子朝不能於我何
害紂衆億兆兼有四夷不能同德終敗亡武王言我有
治臣十人雖少同心也今泰誓無此語杜註所謂今泰

誓指前漢偽泰誓也 今按萇弘之言正因泰誓同心
同德之言故言惟同德者則能度義今甘桓公雖見子
朝不過如紂之離德者耳雖有億兆亦奚以為蓋同德
與離德相對意自明白故下又勸其務德無患無人作
古文者無以釘齟成篇並萇弘之所自言亦畧以為經
又生同力度德之言於上則以力鈞者度德德鈞者度
義竊取王子朝年鈞以德德鈞以卜又襄三十年穆叔
年鈞擇賢義鈞則卜之意而於泰誓離德同德之義背

馳矣於是遂移葢弘所引之本文於中篇而改曰受有臣億萬惟億萬心予有臣三千惟一心則並同力度德之言鈇鉞四五句矣此其湊合補綴之大畧如此也嘗考之淮南子兵略訓兵靜則固專一則威分決則勇心疑則北力分則弱故紂之卒百萬之心武王之卒三千人皆專而一故千人同心則得千人力萬人異心則無一人之用故其言有所本矣殊不知受有臣億萬即紂有億兆夷人惟億萬心即離心萬字比兆字則變而少

矣予有臣三千即予有亂臣十人惟一心即同心三千
比十人則變而多矣三千用孟子虎賁三千人也中篇
之末曰乃一德一心又改同字為一字亦何用如此之
重複耶劉炫不知反據古文以規杜註噫劉炫過矣襄
二十八年叔孫曰武王有亂臣十人崔子具有乎又襄
二十九年子太叔曰棄同即異是謂離德

民之所欲天必從之

襄三十一年穆叔曰泰誓云民之所欲天必從之昭元

年子羽亦引泰誓云云杜預註今尚書泰誓亦無此文故諸儒疑之孔氏正義曰今尚書泰誓謂漢魏諸儒馬融鄭玄王肅等所註者也云云記傳所引泰誓悉皆有之周語單襄公亦引此二句鄭語史伯亦引

朕夢協朕卜襲于休祥戎商必克

昭六年史朝曰筮襲于夢武王所用也杜註外傳云泰誓曰朕夢云云必克此武王辭今按外傳國語是也周語單襄子云其下云以三襲也

亶聰明作元后元后作民父母

此一節全出後漢書劉陶傳曰陶上疏曰人非天地無以為生天地非人無以為靈是故帝非人不立人非帝不靈其曰人非天地無以為生即天地萬物父母一句之所從出也天地非人無以為靈即惟人萬物之靈一句之所從出也帝非人不立即亶聰明作元后二句之所從出也人非帝不寧即元后作民父母一句之所從出也此人收拾逸書見陶疏下文有云目不視鳴條之

師耳不聞檀車之聲遂攘此而點化成文正猶使疾其民以盈其貫本中行桓子之言也因下文引周書曰殪戎殷遂攘以為商罪貫盈之句皆因收拾逸書故也古文尚書直至東晉時出劉陶范曄實未嘗見古文非劉陶范曄之蹈襲明甚易傳曰乾天也故稱乎父坤地也故稱乎母遂以天地萬物父母奪換人非天地無以為生之句其氣象較之陶語宏大不侔然實孔聖之語劉陶之意武王初未嘗及此語也云人者禮運曰人者天

地之心遂以惟人萬物之靈奪換天地非人無以為靈之
句其語意較之陶語亦精密不侔然實禮運之語劉陶
之語非武王當時實語也祈父云亶不聰中庸云聰明
足以有臨也又於孟子所引天降下民作之君作之師
遂以亶聰明作元后奪換帝非人不立之句其氣象較
之陶語亦開爽英邁但遺非人不立四字意耳然實詩
人中庸之詞劉陶之詠亦非武王當時實語也詩云樂
只君子民之父母孟子云為民父母行政又因孟子兩

作字又換洪範天子作民父母之作遂以元后作民父母奪換人非帝不寧之句其辭氣較之陶語亦大不侔然皆蒐略詩人孟子洪範之言而非武王當時實語也非謂武王不能為此語但聖人言語意自然渾成不似偽為者之摭拾如此也昔朱子與侍郎林栗談西銘栗曰首言乾稱父坤稱母是以天地為父母繼又言大君者吾父母吾不知其言為何如也蓋以為汨彝叙之意有兩父母之相駁故也朱子曰言大君者吾父母之宗

子非謂大君為父母也侍郎以理學名家如此看書豈
不為人所笑栗曰我正欲為人所笑明日劾朱子而朱
子力乞奉祠以去其后朱子亦自悔其當時之詞氣之
出招拳惹踢初無怨栗之心也自今觀之栗之談西銘
誠謬矣若如偽泰誓者首言天地萬物父母下文即言
元后作民父母自相乖刺以天地父母為是則元后失
之亢而僭以元后父母為是則天地失之卑而凌蓋徒
知易傳洪範孟子之可據而不知聖賢之言各有攸當

不至於汨彛叙而反相駁也由是言之反不若劉陶之言平正通達而不相悖黃帝正名百物豈其如此武王吐辭為經又豈若然哉

泰誓下

厥鑒惟不遠在彼夏王

周語太子晉引詩曰殷鑒不遠近在夏后之世

作奇技淫巧以悅婦人

王制曰作淫聲異服奇技奇器以疑衆殺月令毋或

作為淫巧以蕩上心漢書禮樂志曰書序殷紂斷棄祖宗之樂乃作淫聲用變亂正聲以悅婦人

予克受非予武惟朕文考無罪受克予非朕文考有罪惟予小子無良

坊記子云善則稱親過則稱已則民作孝泰誓曰予克云云但二受字皆作紂

古人有言曰撫我則后虐我則讐獨夫受洪惟作威乃汝世讐

荀子議兵篇暴國之君其民之視我歡若父母反顧其上
若仇讐又曰湯武之誅桀紂若誅獨夫故泰誓曰獨夫
紂此之謂也淮南子道廣訓尹佚曰四海之內善之則
吾畜也不善則吾讐也昔夏商之民反讐桀紂而臣湯
武

淮南子兵略訓決獄無辜殺戮無罪又曰武王伐紂東
南而迎歲至汜而水至其頭而墜彗星出而授殷人其
柄當戰之時十日亂于上風雨擊于中

崇信姦回放黜師保屏棄典刑囚奴正士

牧誓是崇是長是信是使摘取崇信二字襄十四年劉
定公曰師保萬民正義引泰誓云放黜師保詩咨爾殷
商雖無老成人尚有典刑史記紂囚箕子為奴

樹德務滋去惡務本

哀元年伍員曰臣聞之樹德莫如滋去疾莫如盡又戰
國策秦客卿造曰詩云樹德莫如滋除害莫如盡

崇信姦回放黜師保屏棄典刑囚奴正士

宣四年王孫滿商紂暴虐其下又有姦回昏亂之句襄二十三年閔馬父曰姦回不軌禍倍下民可也

爾衆士其尚迪果毅以登乃辟功多有厚賞不迪有顯戮

宣二年君子曰戎昭果毅以聽之之謂禮殺敵為果致果為毅易之戮也易之即不迪之別名也

武成

惟先王建邦啓土公劉克篤前烈至于太王肇基

王迹王季其勤王家我文考文王克成厥勲誕膺
天命以撫方夏大邦畏其力小邦懷其德惟九年
大統未集予小子其承厥志底商之罪告于皇天
后土所過名山大川

周語祭公謀父曰昔我先世后稷以服事虞夏又曰我
先王不窋此所以稱后稷為先王也又韋昭註商亦稱
契為玄王詩云即有邠家室又魯頌曰奄有下國故言
建邦啓土也大雅曰篤公劉故言克邁前烈也魯頌曰

實惟太王實始翦商又曰纘太王之緒綿詩廟室門社
中庸曰追王太王故曰肇基王迹也又曰以王季為父
父作之詩曰帝作邦作對則篤其慶受祿無喪中庸曰
追王王季禮記引泰誓曰朕文考無罪文王有聲曰邇
觀厥成又詩書所稱文王受命假哉天命宅天命以受
方國王赫斯怒整旅遏密伐肆絕忽戡黎等大邦畏其
力也虞芮小國睹揖讓之風遂讓爭田為閒田漢南諸
侯聞之歸者四十餘國小邦懷其德也惟九年者以蹶

厥生之年為受命元年也故註疏家遂有文王聰虞芮之頌諸侯歸之改稱元年至九年而卒也大統未集者三分天下有其二也記引書曰惟予小子無良故稱予小子中庸曰武王達孝善繼人之志今改作承厥志者不宜全寫中庸也但中庸所謂志者制禮作樂之志此所謂志欲集大統之志雖能用中庸之文而不免墮於史家西伯陰行善之云則語圓而意悖矣

哀二年衛太子禱曰曾孫蒯瞶敢昭告于皇祖文王云

云以集大事無作三祖羞告于皇天與泰誓類于上帝
相應告于后土與泰誓宜于冢土相應歐陽脩知中間
不再改元為註家之非而不知誕膺天命惟九年乃武
成古文之非也

襄三十年北宮文子云周書數文王之德曰大國畏其
力小國懷其德言畏而愛之也

史記追尊古公為太王公季為王季蓋王瑞自太王興
武王即位脩文王緒業九年武王上祭於畢東觀兵至

於孟津武王自稱太子發言奉文王以伐不敢自尊乃
告司馬司徒司寇諸節齊信栗哉予無知以先祖有德
臣小子受先公功畢立賞罰以定其功

其勤王家

見禮記祭統孔悝銘曰其勤公家

既戊午師逾孟津癸亥陳于商郊俟天休命甲子
昧爽受率其旅若林會于牧野罔有敵于我師前
徒倒戈攻于後以北血流漂杵

周語伶州鳩曰王以二月癸亥夜陳未畢而雨以夷則之上宮畢之則戊午者一月也又曰王以黃鐘之下宮布戎于牧之野牧誓曰時甲子昧爽王朝至于商郊牧野詩曰殷商之旅其會如林矢于牧野維予侯興史記陳師牧野紂聞武王來亦發兵七十萬人至武王使師尚父與百夫致師以大率馳帝紂師紂師雖衆皆無敵之心欲武王亟入紂師皆倒兵以戰以開武王馳之紂兵皆崩叛

華夏蠻貊罔不率俾

襄三十年北宮文子曰蠻夷帥服

今商王受無道

昭七年辛丑無宇曰昔武王數紂之罪以告諸侯曰紂為云云故夫致死焉

史記殷之末孫紂殄廢先王明德侮蔑神祇不祀昏棄商邑百姓其彰顯聞于皇天上帝武王更大命革殷受天明命

垂拱仰成

前漢書薛宣傳馮翊垂拱蒙成

見後漢書孝章八子傳曰清河王廢曰仰恃明主垂拱受成

丁未祀于周廟邦甸侯衛駿奔走執豆籩越三日

庚戌柴望大告武成

禮記大傳牧之野武王之大事也既事而退柴於上帝
祈于社設奠于牧室遂率天下諸侯執籩豆駿奔走追
王太王亶父王季歷文王昌

厥四月哉生明王來自商至于豐乃偃武修文歸

馬于華山之陽放牛于桃林之野示天下弗服

樂記曰武王克殷反商未及下車而封黃帝之後于薊
封帝堯之後于祝封帝舜之後于陳下車而封夏后氏
之後于杞投殷之後于宋封王子比干之墓釋箕子之囚
使之行商容而復其位庶民弛政庶士倍祿濟河而西
馬散之華山之陽而弗復乘牛散之桃林之野而弗復
服車甲衅而藏之府庫而弗復用倒載干戈包之以虎

皮將帥之士使為諸侯名之曰建纛然後天下知武王之
不復用兵也 今按記言弗復乘馬服牛而古文獨言
示天下弗服者欲以一服字兼牛馬言欲與記小異也
又史記縱馬于華山之陽放牛于桃林之墟偃干戈振
兵釋旅示天下不復用也

釋箕子囚封比干墓式商容閭散鹿臺之財發鉅
橋之粟大賚于四海而萬姓悅服

史記命召公釋箕子之囚命畢公釋百姓之囚表商容

之間命南宮括散鹿臺之財發鉅橋之粟以振貧弱萌
隸命閔天封比干之墓命宗祝享祠于軍乃罷兵西歸
行狩記政事作武成

襄十八年荀偃禱曰齊環棄好背盟凌虐神主曾臣彪
率諸侯以討焉其官臣偃實先後之荀捷有功毋作神
羞官臣偃毋敢復濟惟爾有神裁之 尚書註疏此篇
叙事多而王言少云云周語伶州鳩曰王以二月癸亥
夜陳未畢而雨云云至所以優柔容民也

又衛彪傒曰后稷勤周

漢書王褒曰雍容垂拱永永萬年

旅獒

人不易物惟德其物

僖五年宮之奇曰民不易物惟德繫物改民為人改繫
為其

惟克商遂通道于九夷八蠻西旅底貢厥獒太保
乃作旅獒用訓于王曰嗚呼明王慎德四夷咸賓

無有遠邇畢獻方物惟服食器用王乃昭德之致
於異姓之邦無替厥服分寶玉于伯叔之國時庸
展親

晉語范文子曰夫王者成其德而遠人以其方賄歸之
宣二年公噬夫葵杜註猛犬也說文噬使犬也服虔作
噉尚書傳云葵犬犬也爾雅云狗四尺為葵說文云犬知
人心可使者

魯語陳惠公使人以隼如仲尼之館問仲尼曰隼之來

也遠矣此肅慎氏之矢也昔武王克商通道於九夷八蠻使各以其方物來貢使無忘職業於是肅慎氏貢楛矢石砮其長尺有咫先王欲昭其令德之致遠也以示後人使永鑒焉故銘其括曰肅慎氏之貢矢以分太姬配虞胡公而封諸陳古者分同姓以珍玉展親也分異姓以遠方之職貢使無忘服也故分陳以肅慎氏之貢楚語申叔時蠻夷戎狄其不賓也久矣僖七年諸侯官受方物

表記子曰狎侮死焉而不畏也淮南子精神訓不貴難得之貨不器無用之物又曰貴遠方之貨珍難得之財
犬馬非其土性不畜

僖十五年晉侯與秦戰乘小駟鄭入也慶鄭曰古者大事必乘其產生其水土而知其人心安其教訓而服習其道惟所納之無不如志今乘異產以從戎事及懼而變將與人易亂氣狡憤陰血周作張脈憤興外彊中乾進退不可周旋不能君必悔之

微子之命

王若曰猷殷王元子

之命二字擬文侯之命王若曰猷見大誥等篇殷王元子見召誥有王雖小元子哉蓋微子乃帝乙之長子故云爾也又首呼此四字者若康誥呼小子封之類是也哀公九年陽虎以周易筮之遇泰之需曰微子啓帝乙之元子也

惟稽古宗德象賢統承先王修其禮物作賓于王

家與國咸休永世無窮

僖二十四年皇武子曰宋先代之後也於周為客天子
有事膳焉有喪拜焉文二年謂之崇德昭二十五年宋
樂大心曰我不輸粟我於周為客若之何使客改客作
賓者用虞賓在位之字取利用賓于王之句也郊特牲
繼世以立諸侯象賢也以官爵人德之殺也又曰天子
存二代之後猶尊賢也尊賢不過二代

崇德又見武成

嗚呼乃祖成湯克齊聖廣淵皇天眷佑誕受厥命
撫民以寬除其邪虐功加于時德垂後裔

此段稱成湯之德以起下文封微子之意乃祖字見盤
庚齊聖廣淵見左傳稱八愷皇天眷佑見周書誕受厥
命見周書

爾惟踐修厥猷舊有令聞恪慎克孝肅恭神人
文元年左傳踐修舊好

予嘉乃德曰篤不忘

僖二十八年敬服王命以綏四國

見左傳僖公十二年王曰舅氏余嘉乃勲應乃懿德謂
督不忘往踐乃職無逆朕命蓋周襄王命管仲之辭也
今節去勲應乃懿四字改謂字為曰字而直至篇末方
曰往哉惟休無替朕命

以蕃王室

襄二十九年子展曰堅事晉楚以蕃王室又蔡仲之命
亦用此句

左傳僖七年許男面縛銜璧大夫衰經士與觀楚子問
諸逢伯對曰昔武王克殷微子啓如是武王親釋其縛
受其璧而被之焚其櫬禮而命之使復其所史記宋世
家云微子啓者帝乙之首子紂庶兄武王克殷微子乃
持其祭器造于軍門肉袒面縛左牽羊右把茅膝行而
前以告於是武王乃釋微子復其位成王誅武庚乃命
微子代殷之後國于宋夫微子手縛于後故以口銜璧
又焉得牽羊把茅此皆史遷之妄耳

蔡仲之命

蔡仲二字見左傳定四年春三月其子蔡仲改行帥德
乃祝佗之言也之命二字見左傳曰見諸王而命之以
蔡其命書云也又微子之命康王之誥皆效文武之命
如此

今按祝佗之言可以見周書四篇逸者三篇一伯禽二
康誥三蔡仲是也獨康誥一篇存耳或曰伯禽者註云
周公世子時周公唯遣伯禽之國故皆以附伯禽蓋指

上文分罷而言也子謂之逸書可乎曰非然也此註家之淺陋也其上文言分魯公以大路云云而后綴之曰命以伯禽與下文分康叔云云而命以康誥分唐叔云云而命以唐誥同一例也彼二篇為書之篇名而伯禽獨不為書之篇名乎蓋若太甲盤庚微子之類直以名篇而其體則誥也不然魯公即伯禽也上言分魯公而下文又言命以伯禽復成何等文理哉伯禽與康誥唐誥同為誥之篇名不辨可知矣但今百篇之序不言伯

禽者同註家之誤也不然其意以為刪之而不必序也
觀唐誥不序可見然封伯禽唐誥其誥決不苟當為逸
書或曰如吾子之言三篇皆逸而蔡仲之命為後人所
補則後人何以獨不補伯禽唐誥曰周之誥大抵多出
于周公其言閎肆廣大非包涵宇宙胸襟不能及也觀
諸康誥體制則後之人掇拾鈎餌安可比並是以畧而
不敢補耳唯蔡仲則左傳之文畧具本末可以湊合成
篇然自識者視之真為兒戲耳而亦足以籠蔽數十百

萬之耳目獨何故哉篤信古書之過遂至于受欺也或曰上文命以伯禽等凡有數命字而其下則謂之誥然則蔡仲雖有命諸王命書云之二命字亦當除去之命二字而但名曰蔡仲亦誥體耳曰子之言得之

惟周公位冢宰正百工羣叔流言

惟字效洪範召誥周公字極用的無識見壞大體昧王綱悖天理惑千載由是後之蠢蠢拘執不顧義理者遂作詩云假使當年周公身死則一生之真有誰知哉

而聖人之心始無以暴于天下以為周公完名幸于不
遽沒其身耳而為善者因以怠矣人亦孰知古文偽書
之害一至此哉或者驚曰敢問何故曰子考諸祝佗之
言則孰真孰偽孰得孰失昭然若數一二矣佗曰管蔡
啓商基間王室八字之間知大體提王綱循天理明千
載管蔡之罪不容誅而周公心事落落青天白日矣傳
雖賢人以下之言然乃當時之耳聞目擊者故能得其
實也偽書假托聖人之口人亦不疑而信之遂以聖人

為真見疑於上下亦無可奈何則豈不害天理而無忌憚之甚哉管叔兄也周公弟也對周公而稱羣叔則其思慮之不到不顧文理之牴牾也其曰位冢宰正百工而羣叔流言者則其言知慮之所到欲以發明周公未嘗踐阼之大義也冢宰字見周禮百工字見虞書又三字二句擬周禮文法羣叔字改金滕管叔及其羣弟之弟字也金滕稱管叔者對武王既喪而言也

乃致辟管叔于商囚蔡叔于郭鄰以車七乘降霍

叔于庶人三年不齒

昭元年子太叔曰周公殺管叔而蔡蔡叔夫豈不愛王室故也上蔡字說文作繫 从殺下米搥繫散之也

周公之心明白正大當時雖披堅執銳之人亦知之故曰周公東征四國是皇哀我人斯亦孔之將則其不為一己之流言而致辟管叔而囚蔡而降霍可知矣曷觀諸大誥及以下八篇則當時管蔡啓商王室蠢蠢誠為大變故祝佗之言得當時之事實偽書者因金縢之言

而不考之以下文罪人斯得之故又不參之以大誥及詩東
山破斧之篇而失之遂以周公為真若為已而誅管蔡等何
其曖昧偏狹而不顧道理一至此哉祝佗曰王於是乎
殺管叔而蔡蔡叔其言又孰真孰偽孰得孰失亦昭然
若數一二矣其所以必改祝佗之言者何居恃金縢為
之証故也而天下之大勢昏如無知矣祝佗但云殺管
叔而此增致辟于商四字致辟者因金縢我之弗辟而
誤也弗辟之辟即避字也因其上文有我字遂以為周

公致辟也又襄二十五年子產曰惟罪所在各致其辟
于商之商乃易監殷之殷字也蔡者放也拘囚則殛矣
郭鄰蔡之換字也傳無霍叔一節此增之者以終金縢
之羣弟及此篇上文之羣叔也又史記同三年不齒見
周禮大司寇 今按以車七乘下傳猶有徒七十人今
刪之者以見其文詞富盛不必盡用傳文且又拘於上
下句欲其齊整故也是其用心勤矣然以為有一字之
關於名教則否

蔡仲克庸祇德周公以為卿士叔卒乃命諸王邦之蔡

傳有其子二字而此刪之者蓋此增霍叔一事則未知其為蔡叔之子乎未知其為霍叔之子乎故刪二字也獨曰蔡仲二字庶幾人得以蔡字而貫於蔡叔云耳傳有改行帥德之言而此易以克庸祇德者不欲盡同傳文故易彼四字于王若曰之下也但自今觀之王若曰之下果有此四字則祝佗必不攘為己之言四字既出

祝佗之口則王若曰之下決無此四字曰克庸祇德云者倣克明峻德克慎明德之類也祇德見呂刑又庸庸祇祇各刪其一字見康誥也傳有周公舉之以為已卿而此刪去舉之與已三字不欲盡同傳文又因以示經文簡質使後之儒者讀之欣艷侈張曰經文簡古非傳文可比也蓋讀至于叔卒而其文拙矣仲之上既無其子字叔之上又無乃父字有若鴈行然者而子顧若父兄顧若弟幾于汨彞叙豈不拙甚矣哉想其人猶傲然

得志必曰聖經古文其疇敢不以意會而欲致疑於害
意之文辭耶傳無叔卒二字而此增之者顯今文之得
失而傳之缺文也卒之為言因下文考字而得之傳有
見諸王而命之以蔡其命書云今以命易見以邦易命
而刪去七字者其知與上文刪去舉之與已三字意同
王若曰小子胡惟爾率德改行克慎厥猷肆予命
爾侯于東土往即乃封敬哉爾尚蓋前人之愆惟
忠惟孝爾乃邁迹自身克勤無怠以垂憲乃後率

乃祖文王之彞訓無若爾考之違王命

傳但云王曰而此增若字者效前後經文之王若曰也
小子胡者效小子封也傳但有胡字而此加小子者亦
以異傳文也傳無惟爾二字率德二字在改行下率字
傳作帥克慎厥猷擬詩克慎其德又文侯之命克慎明
德前句用其體此用其字下文有大小猷肆予命爾侯
于東土效肆爾在茲東土往即乃封敬哉即康誥往哉
封勿替敬典也爾尚二字見酒誥蓋前人之愆見魯語

臧文仲曰孟孫善中矣其可以蓋穆伯而守其後於魯乎
惟忠惟孝用孝經意效惟君惟長又邁迹即邁種德之邁
字自身即躬行意克勤字凡三見無怠字凡四見垂憲乃
後凡再見率乃祖文王之彛訓率字用詩率由字然自
犯上文率德之率彛訓二字見酒誥此句又因下句爾
考而翻出也傳但有毋若爾考之違王命也而此上文
增加者亦若禹謨增加論語之文也

皇天無親惟德是輔民心無常惟惠之懷為善不

同同歸于治為惡不同同歸于亂爾其戒哉慎厥
初惟厥終終以不困不惟厥終終以困窮

僖五年宮之奇曰周書曰皇天無親惟德是輔注曰逸
書正義曰蔡仲之命文也首四句即太甲下篇首四句
為善不同即德惟治六句小出入其下文初終之戒即
終始慎厥與之意此可見其出于一手一律之意又下
無作聰明亂舊章與罔以辨言亂舊政罔以側言改厥
度字樣句法雖避多方而情狀終不可掩也襄二十五

年太叔文子曰君子之行思其終也思其復也書曰慎始而敬終杜註逸書正義曰蔡仲之命云慎厥終終以不困此所引者蓋是彼文學者各傳所聞而字有改易或引其意而不全其文故不同也蓋慎厥初即慎始惟厥終即上文思其終故為謬亂何不同之有

周官

位不期驕祿不期侈恭儉惟德無載爾偽

戰國策平原君引公子牟與應侯曰貴不與富期而富

至富不與梁肉期而梁肉至梁肉不與驕奢期而驕奢至驕奢不與死亡期而死亡至累世以前坐此者多矣孟子曰侮奪人之君惡得為恭儉恭儉豈可以聲音笑貌為哉約二書之旨以成四辭誠亦妙矣哉襄二十年君子曰詩曰淑慎敬止無載爾偽信之謂也杜註逸詩晉人見詩無此二句攘以為書

三公三孤

周禮司服王為三公六卿錫衮公之服自衮冕而下如

王之服孤之服自希冕而下如子男之服卿大夫之服自玄冕而下如孤之服

典命王之三公八命卿六命大夫四命公之孤四命中車孤乘夏篆卿乘夏縵大夫乘墨車司常王建太常諸侯建旂孤卿建旌大夫士建物射人掌國之三公孤卿大夫之位三公北面孤東面卿大夫西面其贊三公執璧孤執皮帛卿執羔大夫鴈孤卿大夫以三耦相孤卿大夫之灋儀司士三公北面東上孤東面北上卿大夫

西面北上孤卿特揖太僕掌三公孤卿之弔勞王不貶
朝則辭於三公及孤卿也弁師孤卿大夫之冕小司寇
三公及州長百姓北面朝士左九棘孤卿大夫位焉面
三槐三公位焉賈子曰昔者成王幼在襁抱之中召公
為太保周公為太傅太公為太師保保其身體傅傅之
德義師道之教訓此三公之職也於是為置三少皆上
大夫也曰少保少傅少師是與太子宴者也故乃孩提
有識三公三少因明孝仁禮義以道習之文王世子曰

太傅審父子君臣之道以示之少傅奉世子以觀太傅之德行而審喻之太傅在前少傅在後入則有保出則有師是以教諭而德成也師也者教之以事而喻諸德者也保也者慎其身而輔翼之而喻諸道者也記曰虞夏商周有師保有疑丞設四輔及三公不必備唯其人語使能也 今按周禮孤厠於三公之下卿大夫之上而無三孤之數賈子有三公三少之數而非三孤之稱今太師太傅太保曰三公少師少傅少保曰三孤

則正用賈生保傅之篇而特改三少之少字從周禮之孤字耳蓋周官一篇全是約周禮一書而成之周禮三公及三孤無定位無專職乃六卿之兼官也故周公召公皆以太師太保兼領冢宰延及宣王之世王命卿士太師皇父猶率舊也蓋得其人可以兼則兼之不得其人不可以兼則直虛其位而不輕任也故周禮一書於公孤不言所掌不詳所統因服位儀等而偶道及之耳作古文者亦窺見此意故首為周禮分數以三公三孤

先言之於六卿之上其義如此也

若昔大猷制治于未亂保邦于未危

老子曰為之於未有治之於未亂

慎乃出令令出惟行弗惟反

漢書劉向傳上封事引易曰渙汗其大號言號令如汗
汗出而不反者也令出善令未能踰時而反是反汗也
又曰出令則如反汗用賢則如轉石去佞則如拔山後
漢書胡廣傳政令惟汗往而不反

推賢讓能庶官乃和不和政厯

劉向封事曰舜命九官濟濟相讓和之至也衆賢和於
朝則萬物和於野又曰離選衆賢罔不肅和崇推讓之
風以銷分爭之訟又曰此皆不和賢不肖易位之所致
也

以公滅私

文六年史駢曰以私害公漢書賈捐之薦楊興曰抱公
絕私則尹翁歸

推賢讓能庶官乃和不和政厯舉能其官惟爾之
能稱匪其人惟爾不任

荀子仲尼篇曰擅寵於萬乘之國必無後患之術莫
若好同之援賢博施除怨而無妨害之能耐任之則慎行
此道能不耐任且恐失寵則莫若早同之推賢讓能而
安隨其後如有寵則必榮失寵則必無罪是事君者
之寶也而必無後患之術故知者之舉事也滿則慮嘽
平則慮險安則慮危

班固燕然山銘曰寅亮聖明登翼王室納于大麓維清
緝熙

學古入官議事以制

襄三十一年子產曰僞聞學而後入政此五句用其意
昭六年叔向曰昔先王議事以制不為刑辟此句匪畧
也因有先王二字故也所謂蒐羅以甚者也

君陳

我聞曰至治馨香感于神明黍稷非馨明德惟馨

僖五年宮之奇周書又曰黍稷非馨明德惟馨其上文曰鬼神非人實親惟德是輔下文曰若晉取虞而明德以薦馨香神其吐之乎即至治馨香感于神明之謂然則其所謂我聞者曷聞哉聞諸宮之奇而已

爾無忿疾于頑無求備于一夫必有忍其乃有濟
有容德乃大

周語富辰曰今以小忿棄之論語曰無求備于一人富辰又曰書有之曰必有忍也若能有濟註若猶乃也

惟汝令德孝恭惟孝友于兄弟克施有政命爾尹
茲東郊敬哉

周語單襄公曰晉襄公曰驪此其孫也而令德孝恭非
此其誰也論語書云孝乎惟孝友于兄弟施于有政今
作克施

爾有嘉謀嘉猷則入告爾后于內爾乃順之于外
曰斯謀斯猷惟我后之德嗚呼臣人咸若時惟良
顯哉

坊記子云善則稱君過則稱己則民作忠君陳曰爾有
嘉謀云云顯哉但后字皆作君斯字皆作此無臣人咸
若時而未句增是字

凡人未見聖若不克見既見聖亦不克由聖爾其
戒哉

緇衣君陳曰未見聖若己弗克見既見聖亦不克由聖
昔周公師保萬民民懷其德往慎乃司茲率厥常
懋昭周公之訓惟民其人

襄十四年劉定公曰昔伯舅太公右我先王股肱周室
師保萬民世祚太師以表東海今余命爾環茲率舅氏
之典纂乃祖考毋忝乃舊敬之哉毋廢朕命

出入自爾師虞庶言同則繹

緇衣君陳曰出入之庶言同無則繹二字

惟民生厚

成十六年申叔時曰民生厚而德正

畢命

樹之風聲弗率訓典

文六年君子曰並建聖哲樹之風聲又曰告之訓典
史記康王命作策畢公分居里成周郊作畢命

世祿之家鮮克由禮

昭二十年叔孫昭子曰然則戴桓也汰侈無禮已甚亂
所在也

晉語叔向曰桓子驕泰奢侈貪欲無藝畧則行志假貸
居賄卻昭子恃其富寵以泰于國其寵大矣一朝而滅

莫之哀也惟無德也

晉語叔孫穆子曰此之謂世祿非不朽也左莊二十四
年御孫曰儉德之共也侈惡之大也

惟公懋德克勤小物弼亮四世正色率下罔不祇
師言嘉績多于先王予小子垂拱仰成

晉語知伯國曰夫君子能勤小物故無大患淮南子道
應訓武王之佐五人許慎註謂周公召公太公畢公毛
公也武王于五者不能一事焉然而垂拱受成功焉善

乘人之資也

公羊傳孔父正色立于朝

惟周公左右先王綏定厥家

襄十四年劉定公曰昔伯舅太公右我先王改作左右字而君陳篇用其師保萬民一句又用茲率字

嗚呼父師今予祇命公以周公之事

父師二字見今文微子襄十四年劉定公曰今余命汝環下文弗率訓典又變茲率舅氏之典

四夷左社罔不咸賴

襄十四年劉定公曰王室之不壞繫伯舅是賴

欽若先王威烈以休于前政

劉定公曰纂乃祖考無忝乃舊

道有升降政由俗革

襄二十九年叔向宋之樂其以宋升降乎

彰善癉惡

緇衣子曰有國家者彰善癉惡以示民厚則民情不貳
惟十有二年六月庚午朏越三日壬申王朝步自

宗周至于豐以成周之衆命畢公保釐東郊

洪範惟十有三祀召誥越若來三月惟丙午朏越三日
戊申又上文云王朝步自周則至于豐

惟周公左右先王綏定厥家毖殷頑民遷于洛邑

密邇王室

洛誥侃來毖殷大誥天亦惟用勤毖我民多士曰予惟
時其遷居西爾周本紀武王曰毋遠天室多士又曰移
邇遐逝又曰今朕作大邑于茲洛云云爾小子乃興從

爾遷其篇首曰周公初於新邑洛用告商王士又多方
又皇明文衡有辨頑民之說

惟周公克慎厥始惟君陳克和厥中惟公克成厥
終

洛誥多士多方所誌殷者皆周公也故曰克慎厥始多
方曰時惟爾初不克敬于和則無我怨故曰君陳克和
厥中君陳想齒德俱尊于畢公者故肩周而先畢然經
傳別無明文其故何哉細考之以既見聖弗克由聖惟

周公可當聖字故以之繼周公歟

怙侈滅義服美于人驕淫矜誇將由惡終

昭元年子產對叔向曰子皙無禮而好陵人怙富而卑其上又前此徐吾犯之妹美子皙盛飾入布幣而出又后子皙疾子產數之曰人誰不死凶人不終命也襄二十七年慶封之車美叔孫曰服美不稱必以惡終美車何為二十八年叔孫穆子曰善人富謂之賞淫人富謂之殃天其殃之也其將聚而殲旃

雖收放心閑之惟艱

孟子曰仁人心也義人路也繼之曰放其心而不知求
舍其路而弗由哀哉言人知心之為心不知仁之為心
故曰仁為人心使人知仁之切於日用不可須臾放也
今放仁而不知求是即放其心而不知求矣人知路之
為路不知義之為路故名義為人路使人知義之切於
所行而不可須臾舍也今舍義而弗由是即舍路而弗
由矣豈不可哀之甚哉蓋放心者放仁之喻猶舍路者

舍義之喻匪即以心為仁也若即以心為仁是猶即以
路為義矣以譬喻為理可乎哉以喻為理尚不可況直
指譬喻為真而忌其為喻則文理不貫而前後舛錯其
為不可也明矣孟子下文又曰人有鷄犬放則知求之
有放心而不知求者亦接上文放仁而言也言仁猶心
之切非若鷄犬為外物之比知求外物之鷄犬而不知
求切身之仁不知輕重之類甚矣又曰學問之道無他
求其放心而已矣亦承上文言求放仁而已矣匪直以

譬喻為真而即謂之求放心也若以喻為真而即謂之求放心則文理不貫前後舛錯矣古人之文非若後人之對仗下文止言求放心而不知言由正路者省文也言此則彼可以類推矣是亦曰人有舍路而不由者學問之道無他由其舍路而已矣是一貫也豈可以譬喻為真而即謂之由舍路哉作偽書者肆攘無饜巧於益遮至此則忌孟子之上文而獨剽賊其下文放心二字又於孟子前篇開先聖之道下文亦有正人心之說又

剽賊閑之一字綴以惟艱之文也由是後世大儒雖英雄豪傑之士亦為其所蔽錮皆以為真求放心遂使孟夫子文辭前後乖刺分為兩截此不亦不善攘書者之過也哉或曰吾子言孟子之文不容兩截是也遂以古文尚書為攘孟子恐未必然也然則吾子果何所據而決知其出於孟子而不善攘哉曰其所攘者不一而止也曰稽于衆舍己從人曰不虐無告曰朕宅帝位三十有三載曰耄期倦于勤曰惟茲臣庶罔或干予正曰罰

弗及嗣賞延于世曰好生之德洽于民心曰可愛非君
可畏非民曰萬姓仇予曰鬱陶乎予心顏厚有怙怙曰
成湯放桀曰坐以待旦曰營于桐宮曰王徂桐宮曰任
官惟賢才曰匹夫匹婦不獲自盡曰說桀傳巖之野曰
無耻過作非曰監于先王成憲其永無愆曰予弗克俾
厥后惟堯舜其心愧耻若撻于市一夫不獲則曰時予
之辜曰元后作民父母曰罪人以族官人以世曰厥監
惟不遠在彼夏王曰獨夫受曰大告武成曰攻于後以

北血流漂杵曰建官惟賢位事惟能曰所寶惟賢曰為
山九仞曰恭儉惟德無載爾偽曰惟民生厚因物有遷
曰萬世同流曰怵惕曰格其非心其所攘者豈特放心
而止哉惟放心之攘不顧乖刺孟子之本旨蒙蔽後儒
之聰明吾是以發摘如此若夫泮水敝予之類則蒐羅
無遺所以要信于後人非蹈襲之比但改竄易置穿穴
之變多時與孟夫子之所引者相背而馳亦非復尚書
之本經其侮聖言而無忌憚者多矣仁人君子欲盡忠

於聖人而恢復乎本經者其精擇之哉

嗚呼父師今予祇命公以周公之事往哉旌別淑
慝表厥宅里彰善癉惡樹之風聲弗率訓典殊厥
并疆俾克畏慕申畫郊圻慎固封守

君陳畢命二篇乃因多士多方等篇有毖殷遷洛之云
而周公在洛惟七年

畢命考

師曠曰師延靡靡之樂武王伐紂師延投濮水死故聞

此聲必於濮水之上也樂記曰五者皆亂迭相陵謂之慢又曰桑間濮上之音亡國之音也其政散其民流誣上行私而不可止也

君牙

今命爾予翼作股肱心膂纘乃舊服無忝祖考弘敷
五典式和民則爾身克正罔敢弗正民心罔中惟
爾之中

予翼見皋陶謨及周書周語太子晉曰謂其能為禹股

肱心膂以養物農民人也襄十四年劉定公曰纂乃祖考無忝乃舊今改作纘乃舊服無忝祖考凡劉定公之言用之不一而止下文乃惟由先正舊典即變茲率舅氏之典率乃祖考之攸行又用率字

王若曰嗚呼君牙惟乃祖乃父世篤忠貞服勞王家厥有成績紀于太常

周禮司勲凡有功者銘書于王之太常祭于大烝司勲詔之

夏暑雨小民惟曰怨咨冬祁寒小民亦惟曰怨咨
厥惟艱哉思其艱以圖其易民乃寧

緇衣君雅曰夏曰暑雨小民惟曰怨咨冬祁寒小民亦
惟曰怨咨下句無咨字老子無為章圖難於其易

惟予小子嗣守文武成康遺緒亦惟先王之臣克
左右亂四方心之憂危若蹈虎尾涉于春冰

惟予二字見顧命小子亦見顧命嗣守文武四字亦見
顧命中庸曰纘緒顧命曰汝先公之臣服于先王又曰

其能而亂四方詩曰心之憂矣易曰履虎尾詩曰如履薄冰又荀子君臣篇狎虎則危災及其身而引詩曰不敢暴虎一節如履薄冰

同命

惟予一人無良實賴左右前後之士匡其不及繩愆糾繆格其非心俾克紹先烈今予命汝作大正正于羣僕侍御之臣懋乃后德交修不逮

禮記引泰誓曰惟予小子無良孟子曰惟大人為能格

君心之非楚語引衛武公曰朝夕以交戒我史老引武
丁曰必交修予無予棄也賈子曰選天下之端士孝弟
博聞有道術者以衛翼左右前後皆正人也後文又曰
太傅匡其不及史記穆王閱文武之道缺乃命伯冏申
誡太僕國之政作冏命

尚書考異卷四

欽定四庫全書

尚書考異卷五

明 梅鷟 撰

伏生所傳聖人之經為晉人假壁藏古文之名擅改者多矣此聖經之一阨也不可得而知矣猶幸徐廣司馬貞等諸賢人君子及唐人之正義畧存一二尚可考者謹列於左

堯典

辯章百姓

司馬貞曰辯字古文尚書作平史遷作便此文蓋
讀平為浦耕反平既訓便因作便章其今文作便
章古平字亦作便音婢緣反便則訓便遂為辯章
鄒誕生本亦同也

辯秩東作

司馬貞曰古文作平秩史作便程

申命羲叔宅南交

南交下有曰明都三字鄭註云南交下三字摩滅故以意補之也偽古文直無此三字偽孔安國傳曰南交者夏與春交也司馬貞曰孔註未是然則冬與秋交何故下無其文且東嶠夷西昧谷北幽都三方皆言地而夏獨不言地乃云與春交斯不例之甚也然南方有地有名交趾者或古文畧舉一字名地南交則是交趾無疑也今按小司馬之辨極有功於聖經可見偽書偽傳私見妄削非出

壁藏之實矣蔡沈不述鄭註南交下三字摩滅之
故及晉人任意削去之罪其頓忘伏生書之為聖
經甚矣罪豈青災也耶失其本經口以傳授者猶
有摩滅之形跡僭號古文目為藏壁者顧無三字
之影響而乃挾以自是柑結後人之頰舌晉人何
其僭而狠也哉蔡沈攘奪小司馬之註以作傳而
不著其辨以康成註為陳氏而不考所由來又不
知古文之非出於壁藏者不公不明真小黠而大

癡者歟

辯在朔易

大傳當如此司馬貞以為太史公據之而作便在伏
生書古文作平在朔易今以上文例之知其如此
舜讓於德不怡

史遷怡作懌古文改不怡作弗嗣徐廣曰今文作
怡怡即懌也司馬貞曰謂辭讓於德不堪所以心
意不說懌也又前納於大麓司馬貞亦譏孔註之

非其尊信聖經真賢人君子之用心也何者作怡則下文受終文脉方可貫蓋心雖不安而不得已也若既曰弗嗣而下文即曰受終垂則甚矣何先儒之不察耶又顧命王不釋古文乃改作不懌

青災過赦

史遷亦同古文作青災肆赦鄭玄註青災為人作患者也過失雖有害則赦之則今文肆作過無疑矣玄註然下句又云怙其姦邪終身以為殘賊

則用刑之又襄九年晉居疾於虎牢肆青圍鄭古文用此肆字

惟刑之謚哉

徐廣曰今文如此爾雅云謚靜也故史記作靜司馬貞曰古文作恤哉且今文是伏生口誦卹謚聲近遂作謚也今按謚字誠聖人之言恤字不過常人之見耳小司馬此言猶徇常情者也或問何以言之曰言謚則恤意在其中言恤則啓後世故縱

之失

黎民祖饑

徐廣曰今文作祖祖始也史遷作始司馬貞曰古文作阻饑孔氏以為阻難也祖阻聲相近未知誰得今按晉人因孟氏險阻既遠之阻而改祖字后儒以為出於壁藏而信之獨小司馬兩存置疑不逞臆決不苟附和真篤信聖學之用心也然則后儒者又小司馬之罪人乎

典樂教穉子

鄭玄曰國子也司馬貞曰尚書作胄子孔安國曰穉胄聲相近馬亦曰胄長也則前漢偽古文已改此字矣不待晉人偽古文而后改也

臯陶謨

采政忽以出內五言

史記作來始滑尚書滑字作習音忽鄭玄曰習者臣見君所秉書思對命者也君亦有焉以出內政

教於五官司馬貞曰古文尚書作在治忽今文作
采政忽先儒各隨字解之今史記云來始滑於義
無所通蓋來采字相近滑忽聲相亂始又與治相
似因誤為來始滑今依今文音采政忽三字劉伯
莊云聽諸侯能為政及忽怠者是也五言謂仁義
禮智信五德之言鄭玄以為出納政教五官非也
今按采者如古之諸侯采詩以貢於天子之采天
子受之而列於樂官於以考俗尚之美惡與夫政

治之得失則其政其忽皆可以采取而分擇矣故
曰采政忽晉人但見舜典有在璿璣玉衡之在字
即以易伏生之采淺近平易而不艱澁矣殊不知
惟其艱澁而難明也吾固以為真惟其淺近而平
易也吾固以為偽而先儒不明真偽之過小屏棄
聖經之罪大矣上文作繪馬鄭本皆如此古文作
會蓋亦以其古字通用而改之也

自我五禮五庸哉

馬本傳伏生書如此古文作有庸

天明威自我民明威

馬本傳伏生如此古文上句威字作畏蔡沉依古文而注云古文威作畏何其舛哉

奏庶根食鮮食

馬本如此注云根生之食謂百谷古文作艱食鄭玄云稷教人種菜蔬艱阨之食則古文用鄭本

禹貢

鳥夷卉服

鄭玄曰東北之民賦食鳥獸者古文作鳥夷馬融
王肅亦同作鳥則漢時偽者已改此字矣史記作
鳥

濟河惟沅州

鄭玄曰言沅州之界在此兩水之間史遷同古文
作沅

作十有三年乃同

馬鄭本皆作年古文作載

厥土赤埴墳

埴鄭作載徐鄭王皆讀曰熾古文作熾 與馬本

同

彭蠡既都

鄭玄云南方謂都為渚則是水聚會之義史遷作都司馬貞曰古文尚書作渚則亦因鄭注而改是字也

瑤瓊篠簜

馬本如此韋昭瓊音貫古文作琨

均于江海

鄭本作松曰松當為泓馬融作均史記同古文尚書作泓亦因鄭玄讀而即改之也雖似吾甚以為不可也

枕榦栝栢

枕古文作榦榦本又作幹

導開及歧

馬本如此古文作研

至於陪尾

漢書作橫尾

滎播既都

司馬貞曰古文尚書作滎波此及今文並云滎播
播是水播溢之義滎是澤名故左傳云狄人及衛
戰於滎澤鄭玄云今塞為平地滎陽人猶謂其處

為榮播今按小司馬之說援引精當信而有徵可
見古文之擅改今文與土風自來相傳之稱謂悉
不合矣先儒素以經學自負者其能免於不克傳
疑之失乎馬鄭王本皆作榮播

和夷底績

和本作穌鄭云讀曰洹

三百里納秸服

秸本或作稽工八反馬云去其穎音穌

天用巢絕其命

馬本如此玉篇子小反古文作勦

五子之歌

太康尸位以逸豫

逸本又作侑豫本又作杼音同

乃盤遊無度

盤本或作槃

胤征

工執藝事以諫

藝本又作藝

倣擾天紀

倣本又作倣亦作叔

盤庚

左傳引此篇云盤庚之誥馬云不云盤庚誥何非
但錄其誥也取其徙而立功故以盤庚名篇則馬
氏猶未嘗分為三篇從伏生舊也鄭玄云盤庚上

篇是盤庚為臣時事史記云盤庚崩弟小辛立殷復哀百姓思盤庚乃作盤庚三篇則史遷鄭玄皆已依先漢古文也

盤庚小序

將始宅殷

汲冢古文云盤庚自奄遷于殷東哲云尚書序盤庚五遷將治亳殷孔子壁中尚書云將治宅殷是與古文不同也孔穎達曰孔子壁中之書

安國先得其本此將治亳殷不可作將始宅殷
亳字摩滅容或為宅壁內之書安國先得始皆
作亂其字與治不類無緣誤作始字知束皙不
見壁中之書妄為說耳今按晉人以亳殷為一
在河南東皙以殷在河北與亳異穎達篤信晉
書譏彈束皙然束皙之言得之而穎達非也
若顛木之有由枿

馬云顛木而肄生曰枿晉古文作藥本作櫟由

說文作𠂔

不昏作勞

馬本晉古文同鄭本作𠂔勉也

予不掩爾善

掩本又作弇

誕告用單

馬云單丁但反誠也書作亶

高宗彤日

爾雅云又祭也周曰繹商曰彤夏曰復昨

西伯戡耆

耆古文作黎伏生尚書大傳作者戡說文作錢

微子小序

殷既錯天命

馬云錯廢也

用乂稠斂

馬云稠數也鄭本晋古文作雒

自清

馬云潔也晉古文作靖

牧誓

說文牧作母音母

千夫長百夫長

鄭玄注師帥旅帥

玄意以周禮二千伍百人為師師帥皆中大夫
五百人為旅旅有帥夏為卒卒長皆中士晉人

修之曰師帥卒帥可見非先漢孔安國矣

弗禦克奔以役西土

馬氏云禦禁也役為也晉人作逐

洪範

明作哲

孔穎達曰哲字王肅及漢書五行志皆云慈智也
定本作哲則讀為哲晉人偽傳云照了也

亡侮玃獨而畏高明

馬本如此晉人作無虐畏鄭音威

時人斯其惟皇之極

頴達曰此經或言時人德鄭王諸本皆无德字孔傳亦不以德為義定本無德疑衍字也

曰哲時燠若

今按詩小雅或哲或謀作哲為是但伏生晉人本皆作哲音制以照哲釋之惜乎蔡沈之不能存疑也

曰舒恒燠若

晉人作豫鄭王本皆作舒鄭註舉遲也王肅云舒
情也以對照晷故為遲情也鄭云急促自用也

旅燠

馬云作豪酋豪也鄭云燠讀曰豪西戎無君名強
大有政者為酋豪國人遣其酋豪來獻見於周也
孔穎達譏之曰良由不見古文妄為此說

金滕序

王鄭皆云滕東也鄭又云凡藏秘書藏之於匱必
以金緘其表是秘密之書皆藏於匱非周公始造
此匱獨藏此書也

武王有疾不豫

馬本如此偽古文無不豫二字

王有疾弗豫

豫本又作杼

植壁秉圭

晉人傳云植置也孔穎達曰鄭云植古置字故云置也

惟爾元孫某

晉人傳云元孫武王也某名臣諱君故曰某孔穎達曰泰誓牧誓皆不諱發而此獨諱之孔惟言臣諱不解諱之意鄭玄云諱之者由成王讀之也意雖不明當謂成王開匱得書王自讀之至此字口改為某史官錄為此篇因遂成王所讀故諱之牧

誓王自稱者令入史制為此典故不須諱之

我之弗辟

馬鄭音避謂避居東都晉人傳云辟法也以法法

三叔也

對曰信噫

噫馬本作懿猶億也

惟朕小子其親迎

馬本如此晉人作新迎

盡起而築之

本亦作筑謂築其根馬云築拾也鄭王皆云拾也
穎達曰禾為大木所掘起其木拾下禾無所亡失

大誥小序

陳壽云臯陶之謨畧而雅周公之誥煩而悉何則
臯陶與舜禹共談周公與羣臣矢誓也其意或然
但君爽康誥與召公康叔語其辭亦甚委悉抑亦
當時設言自好煩復也管蔡導武庚為亂此篇畧

於管蔡者公難以伐弟為言故專說武庚叛耳誥本亦作弇

大誥繇爾邦多越爾御事

馬本如此晉人作大誥爾多邦鄭王本猷皆在誥下漢書王莽攝位東郡太守翟義叛莽莽依此作大誥其書亦猷在誥下

三監及淮夷叛

鄭云三監管蔡霍也晉人傳云管蔡商蓋見大誥

一篇專為殷小腆而誥故收之如此非晉人之偽傳而何然鄭之說自有孟子監殷可証偽傳非是天降害于我家弗少延

馬本如此晉人害作割弗作不延字讀屬下句

若考作室既底法厥子乃弗肯堂矧弗肯構厥考翼其肯曰予有後弗棄基厥父菑厥子乃弗肯播矧弗肯穫厥考翼其肯曰予有後弗棄基

定本肯堂肯穫之上皆有弗字晉人刪去鄭王本

於肯構之下亦有厥考翼一經晉人刪去孔穎達
曰治田作室為喻也同故以此經結上二事取喻
既同不應重出蓋先儒見下有而上無謂其脫而
妄增之孔穎達既逞其臆見如此蔡沉畧不置思
而即從之遂使聖人之經為晉人所塗抹者凡一十有
四字嗚呼惜哉吾嘗反覆讀之反覆思之伏生之書誠
出於壁藏而晉書之偽自不可蓋也夫作室必由
堂而後構治田必由播而後獲既不肯堂構於何

所既不肯播獲於何物未有不肯堂而猶可望之以
肯構不肯播而猶可望之以肯獲也故當依定本
肯構肯獲之上皆有弗字然後為是其辭氣不可
斷絕與厥考翼一經相為唱和故此一經決不可
少乃聖人之本經顓達以為先儒之妄增則非矣
晉人不知全章之大勢錯認乃字與矧字若相唱
和其意以為堂播之始者輕者尚不肯為况構獲
之終者重者其肯為之乎如此則二句辭氣雍容

可以暫歇故直削去厥考翼一經而不顧也殊不知聖人之本經若曰乃既不肯堂矧又不肯構則厥考翼其肯曰我有後弗棄基者乎言必不以不肯堂不肯構之子為有後不棄基者也下條亦然此其辭氣安可妄削哉疏家專門黨同伐異不足責也蔡沉游於文公之門所當虛心平氣發潛經之幽光然後為有功於文公今晉人曰伏生失其本經口以傳授則諾古文出之壁藏定為五十九

篇則諾如此等處直削經文蒙蔽後學皆其大者茫
不之覺是其胸中懵懵亦已久矣吾請有以曉之甘
誓曰左不攻于左汝不共命右不攻于右汝不共命
御非其馬之正汝不共命凡三用汝不共命以上二
汝不共命為後儒妄增可乎此猶其在夏書者牧誓
曰不愆于六步七步乃止齊焉夫子勗哉不愆于四
伐五伐六伐七伐乃止齊焉勗哉夫子尚桓桓如虎
如貔如熊如羆于商郊弗迓克奔以役西土勗哉夫

子凡一用夫子勗哉二用勗哉夫子以上二句為後
儒妄增又可乎此猶其在誓言者召誥曰相古先民
有夏天迪從子保面稽天若今時既墜厥命今相有
殷天迪格保面稽天若今時既墜厥命凡兩用今時
既墜厥命不可以為重複而當削一句也又其下文
曰我不敢知曰有夏服天命惟有歷年我不敢知曰
不其延惟不敬厥德乃早墜厥命我不敢知曰有殷
受天命惟有歷年我不敢知曰不其延惟不敬厥德

乃早隆厥命則其言之重複殆有甚焉若曰夏殷二
事立言也同但以後章惟不敬厥德乃早隆厥命結
上二事可矣則其侮聖言也豈不甚哉何以異於是
洛誥首叙殷次在康誥

乃洪大誥治

一本作周公迺洪大誥治

酒誥

成王若曰明大命于妹邦

馬本如此注云言成王者未聞也俗儒以為成王
骨節始成故曰成王或曰以成王為少成二聖之功
生號曰成王沒因為謚衛賈以為戒成康叔以慎
酒成就人之道也故曰成此三者吾無取焉吾以
為後錄書者加之未敢專從故曰未聞也妹邦馬
云即牧養之地也朱子嘗曰漢儒釋經之例多曰
未詳有曰未聞孔安國句句要解過獨與漢儒異
殆謂此等處也成王二字馬氏特曰未聞疑之而

不敢刪晉人直刪二字正猶論語之雖少必作直
改之為坐子樂直改之為曰非不可者但以為尊
信論語則亦妄人而已矣蔡沉親炙朱子言諄諄
而聽藐藐亦為不善變矣孔穎達馬鄭王本以文
涉三家而有成字鄭玄云成王所言成道之王三
家云王年長骨節成皆為妄也穎達言三家謂習
歐陽大小夏侯三家者也穎達專門凡與孔安國
異者皆譏為妄焉耳今按成王二字見篇中自成

湯咸至於帝乙成王畏相又云助成王德顯故於
篇首即言以古先成王之道戒之云耳晉人不知
此義而刪去者非也

枳材

馬氏曰古作梓字治木器曰梓治土器曰陶冶金
器曰冶者文於上篇成王字因馬氏以為後加直
刪去況今馬氏有古作梓之言乎

合由以容

一本作合由以庸

召誥

敢以王之讎民百君子

讎或作酬

洛誥

戊辰王在新邑

馬本與晉人如此點句鄭云王在新邑烝祭句

非我小國敢翼殷命

馬本如此晉人作弋義同鄭玄王肅本皆作翼王
亦云取也鄭云猶驅也非我周敢驅取爾殷之王
命雖訓為驅亦為取義

嚮于時下夏弗克庸帝大淫屑有辭

馬本如此時字絕句屑過也晉人作佚又作侑

無逸

嚴恭寅畏

馬本如此晉人作儼

文王俾服即康功田功

王本如此俾使也晉人俾作卑

自朝至於日中昃

本作反

君奭小序

召公為保周公為師

馬鄭云保氏師氏皆大夫官晉人云保太保師

太師也

迪見勗聞於上帝

馬本如此勗勉也晉人作冒

多方

不克終日勸于帝之攸

馬本如此攸所也晉人作迪

因甲于內亂

鄭王皆以甲為狎王云狎習災異於內外為禍亂

鄭云習為鳥獸之行於內為淫亂晉人偽傳曰外

不憂民內不勤德因甲於二亂之內正義曰甲聲
近夾古人甲與夾通用夾於二事之間而為亂行
也

爾罔不克剝

馬本如此晉人作臬

賄息慎之命小序

息慎來賀

馬本如此晉人作肅慎

王俾榮伯

俾必爾反馬本作辨

顧命

王不釋

馬本如此註云疾不解也晉人作懌蓋用史記舜讓于德不懌之文其意以為彼作弗嗣而此用不懌則於文意兩得其當可以易伏生本經而無疑也然而愚則以為於彼此文意兩得其當顧乃以

之易伏生本經斯其所以為無忌憚之尤者也

洮頰水

頰說文作沫云古文作頰說文之所稱古文者謂
馬鄭等所傳者

憑玉几

說文憑作凭云依倚也字林同父冰反

在後之詞

馬本如此云共也晉人作侗

成王崩

馬本如此注安民立政曰成晉人無成字

四人駢弁

馬本駢青黑色也晉人作綦從鄭王本也鄭玄云

青黑曰綦王肅云綦赤黑色

王三宿三祭三說

馬本說下故反奠爵說文同字亦作宅晉人作咤

王肅亦以咤為三奠爵鄭云徐行前曰肅却行曰

咤王徐行前三祭又三却復本位

康王之誥小序

正義伏生以此篇合於顧命共為一篇後人知其不可分而為二馬鄭王本此篇自高祖寡命以上內於顧命之篇王若曰以下始為康王之誥諸侯告王王報誥諸侯而使告報異篇失其義也

成王崩康王既尸天子

馬本如此晉人無成王崩三字

王若曰

馬鄭王本從此以下為康王之誥又云與顧命
差異叙歐陽大小夏侯同為顧命

呂刑

鵠義姦宄

馬云鵠輕也義本亦作誼

皇帝清問下民

古文作君帝孔穎達曰君宜作皇後又曰君帝帝堯也

折民惟刑

馬鄭王皆音慙馬云智也

于有邦有土

馬本如此于於也晉人作吁

惟貨惟求

馬云有求請賕也晉人作來

文侯之命小序

王賜晉文侯

馬本如此晉人王上有平字賜作錫

父義和

馬云能以義和諸侯本作誼鄭玄讀義為儀儀仇皆匹也故名仇字儀

費誓


東郊不開

舊讀皆作開馬本作開

秦誓

惟截截善偏言

馬本如此云截截辭語截削省要也偏少也辭約
損明大辨佞之人晉人作諠音辨



尚書考異卷五